

Inummut ulorianartorsiortitsisumik pinerluttarnerup meeqqat inuusuttullu 18-nit inorlugit ukiullit akornanni annertusigaluttuinnartup pinaveersaartinnissaa siunertaralugu, suliniutit suut aallartittariaqarnersut pillugit apeqquteqaat aallaavigalugu siunnersuut.

(Inatsisartunut ilaasortaq Bo Martinsen, Demokraatit)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Inatsisartunut ilaasortap Bo Martinsenip Demokraatineersup sammisap matuma pingaarutillip oqaluuserineqarnissaanut iliuuseqarsimaninnut qujanaq.

Meeqqat inuusuttullu pinerlineqartutut pinerluttutullu akuunissamat illersorneqarnissaat qitiusumik suliassaasoq Naalakkersuisunit isigineqarput. Inuusuttut 18-it inorlugit akornanni ukiullit inummut ulorianartorsiortitsisumik pinerlunnerit ernumanarluinnarput, tamannalu siunnerfilimmik, suleqatigiiffiusumik tamakkiisumillu iliuuseqartariaqalersitsivoq. Pinaveersaartitsineq meeqqat inuusuttullu sumiiffigisartagaanni aallaaveqassaaq: angerlarsimaffimmi, atuarfimmi, sunngiffimmi inuunermi internetsikkullu. Ataatsimoorfiit atugarissaarnermik, akisussaaffeqarnermik allanullu ataqinninnermik siuarsaasut pitsanngorsassavavut. Ilutigitillugu inuusuttunut atugarliornermik, killissanik qaangiilluni pissusilersornermik imaluunniit pinerlunnialernernik ersiuteqartunut pissarsiariuminartumik piukkunnartumillu tapersersuisinnaasoqarnissaa qulakkiissavarput. Inummut sammititamik pinaveersaartitsinermik suliniutit arlallit nassaassaareerput, taakku inuusuttunut ataasiakkaanut pingaarutilimmik allannguisuupput. Taakkunannga ilaatigut sulisunik ilungersuussilluartunik pilersitsisoqarnikuunera erseqqissassallugu pingaaruteqarpoq, taakkumi inuusuttunut qajannartumi inissisimasunut peqqinnartumik ineriartortitsisumillu maligassiuusunik tarrasorfigisinnaasaminnik tunisisuupput. Aammattaaq Qamani-periusissiami inummut sammititamik pinaveersaartitsinerit aallunneqarput. Ilutigitillugu pinaveersaartitsineq inuit peqqissuunissaannut periusissiamut Inuuneritta III-mut ilaavoq, tassani tarnikkut peqqissuuneq inooqataanermilu ataatsimoorfiit pingaarutilimmik inissisimanissaat qitiutinneqarput. Kommunini arlalinni Kalaallit Nunaanni Politiit suleqatigineqarput, sumiiffinni ingerlataqartut inuusuttut aarlerinartumiittut nassaarinissaat tapersersornissaallu suleqatigiissutigineqarlutik. Iliuuseqarnerit taakku suliassa qarfiit ilaanni inuusuttut pinerluttarnerisa ikilinerannut iluaqutaasimapput, taakku politiit pinaveersaartitsinermik suliaqarnerannik isumaginninnikkullu ingerlatsinermik taparserneqarput.

Kisiannili ilusilersorluakkamik pinaveersaartitsinerup qitiutinneqarnerata annertusineqarnissaa pisariaqartinneqarpoq. Uani pineqartut tassaapput siusissukkut iliuuseqarnek, imigassamat politikki nutaaq, pitsaasunik toqqissisimanartunillu inissiaqarsinnaaneq, ulluunerani paaqqinnittarfinnut immikkoortoq patajaatsoq meeqqallu atuarfiat ingerlalluartoq – taaneqartut tamarmik aalajaatsumik peroriartornermut, atugarissaarnermut, imminut naleqassutsimut, siunissamat neriulluarnermut isumaqarluartumillu misigisaqarnermut tapersiisuupput. Ilusilersorluakkamik pinaveersaartitsineq suliassa qarfiuvoq eqqumaffigineqarnerujussuarnissamik pisariaqartitsiviusoq uagullu inuiaqatigiittut patajaallisinnissaanut siunnerfilimmik sulissuteqarfigisariaqagarput. Inuiaqatigiinnik pitsaasunik toqqagassa qarfiusumik

sanarfinissaq pineqarpoq – tamatumunngalu pinaveersaartitsineq piffissamut ungasissumut isiginniffiusoq ilusilersorluagarlu pisariaqarpoq.

Naalakkersuisut ilaqutariit tapersersorneqarnissamik pisariaqartitsisut pisariaqartitaminnik ikiorneqassasut pingaartilluinnarpaat. Ilaqutariit nukittorsarnerisigut inuusuttut pinerlunnermit allamik toqqagaqarsinnaanerannut aamma nukittorsarsinnaavagut. Peqatigisaanik inuiaqatigiittut suleqatigiinnissarput ilusilersorluakkamillu pinaveersaartitsinerup siuarsarnissaanut ataatsimoorussamik akisussaaftimmik tigusinissarput pisariaqarpoq. Uani pineqarput sinaakkutinik aalajaatsunik toqqissisimanartunillu pilersitsineq, meeqqanut, inuusuttunut ilaqutariinnullu suliaasaqarfiup iluaniinnaanngitsoq, kisiannili aamma ineqarnermut, ilinniartitaanermut peqqissutsimullu suliaasaqarfiit akornanni. Meeqqat inuusuttullu tamarmik inuunermik isumalimmik, neriuutilimmik pitsaasunillu toqqaanertalinnik tuninissaannik iluatsitsissagutta, tamatumunnga ilusilersorluakkamik pinaveersaartitsinermut piffissamut ungasissumut isiginnittumik tunniusimaneq siammasissumillu suleqatigiinneq pisariaqarpoq.